

四庫全書

集部

欽定四庫全書

集部

西晉文紀卷三
四

詳校官庶吉士_臣初喬齡

主事銜_臣徐以坤覆勘

覆校官博士_臣劉光第

校對官中書_臣范 鏊

謄錄監生_臣戴朝琛

謄錄監生_臣孫鵬年

欽定四庫全書

西晉文紀卷三

明 梅鼎祚 編

西晉

惠帝

諱衷字正度武帝第二子泰始三年
立為皇太子嗣位十七年中毒薨

改元永平

武帝大熙元年四月崩皇太子即
位改元永熙明年正月改元永平

朕夙遭不造淹恤在疚賴祖宗遺靈宰輔忠賢得以眇
身託于羣后之上昧于末道不明于訓戰戰兢兢夕惕
若厲乃者哀迷之際三事股肱惟社稷之重率遵翼室

之典猶欲長奉先皇之制是以有永熙之號然日月踰

邁已涉新年開元易紀禮之舊章其改永熙二年為永

平元年

晉書

秘書監詔

永平元年

秘書監綜理經籍考校古今課試署吏領有四百人直

專其事

王隱晉書

改著作詔

元康二年於是改隸秘書省

著作舊屬中書而秘書既別別典文籍今改中書著作郎

為秘書著作郎

北堂書鈔

皇后蠶服詔

元康六年

魏以來皇后蠶服皆以文繡非古義也今宜純服青以

為永制

晉書

公孫淑妃進貴人詔

峻陽園淑妃公孫明識貞粹今進位為貴人

晉起居注

輔太子詔

惠帝即位立適為皇太子盛選德望以為師傅元康元年出就東宮又詔

適尚幼蒙今出上東宮雖當賴師傅羣賢之訓其遊處

左右宜得正人使共周旋能相長益者太保衛瓘息庭
司空隴西王泰息畧太子太傅楊濟息瓘太子太師裴
楷息憲太子少傅張華息禕尚書令華廙息恒並以道
義之門有不肅之訓其令此六人更共往來與太子習
數備賓友也

王隱晉書 雖晉
書作惟長益者止

隴西王世子越楊邈奉朝請詔

元康二年越以
隴西王世子為

騎都尉與駙馬都尉楊邈及琅邪王
仙子繇俱侍講東宮 越改封東海

隴西王世子越駙馬都尉楊邈並可奉朝請侍從左右

與太子游處

晉起
若注

立愍懷子臧為皇太孫詔

臧字敬文太子第二子初與父同幽金墉

永康元年立後為
趙王倫所廢見害

咎徵數發姦回作變適既逼廢非命而沒今立臧為皇

太孫

晉書

汝南王亮為太宰詔

永平元
年三月

大司馬汝南王亮體道冲粹通識政理宣翼之績顯於
本朝二南之風流于方夏將憑遠猷以康王化其以亮

為太宰錄尚書事入朝不趨劔履上殿增掾屬十人給千兵百騎與太保衛瓘對掌朝政

矯授楚王瑋詔

永平元年六月汝南王亮太保衛瓘以瑋性貪戾使與諸王之

國瑋甚忿長史公孫宏舍人岐盛為亮瓘所惡矯稱瑋命誣亮瓘於賈后后使惠帝為詔收亮瓘并以瑋矯制並殺之復為瑋發哀賈后惡亮瓘又忌瑋故以計相次誅

太宰太保欲為伊霍之事王宜宣詔令淮南長沙成都王屯宮諸門廢二公

發楚王哀詔

周公決二叔之誅漢武斷昭平之獄所不得已者廷尉奏瑋已伏法情用悲痛吾當發哀

徙東萊王蕤詔

蕤齊王攸子周之弟積怨問密表問專權與左衛將軍王興謀

廢問事覺免為庶人

大司馬以經識明斷高謀遠畧猥率同盟安復社稷自書契所載周召之美未足比勲故授公上宰東萊王蕤潛懷忌妬苞藏禍心與王興密謀圖欲譖害收輿之日蕤與青衣共載微服奔走經宿乃還奸凶赫然妖惑外

內又前表罔所言深重雖管蔡失道牙慶亂宗不復過也春秋之典大義滅親其徒蕤上庸

立成都王頽為皇太弟詔

永安元年二月初太子遹廢臥立清河

王聿為太子成都王頽復廢聿自立為皇太弟

朕以不德纂承鴻緒于茲有五載禍亂滔天姦逆仍起至乃幽廢重宮宗廟圯絕成都王頽溫仁惠和剋平暴亂其以頽為皇太弟都督中外諸軍事丞相如故

豫章王熾為皇太弟詔

永安元年十二月河間王顥將張方逼帝遷長

安顯廢頽表立熾
為太弟是為懷帝

天禍晉邦冢嗣莫繼成都在儲貳政績虧損四海失望不可承重其以王還第豫章王熾先帝愛子令問日新四海注意今以為皇太弟以隆我晉邦以司空越為太傅與太宰顗夾輔朕躬司徒王戎參錄朝政光祿大夫王衍為尚書左僕射安南將軍虢安北將軍濬平北將軍騰各守本鎮高密王簡為鎮南將軍領司隸校尉權鎮洛陽東中郎將模為寧北將軍都督冀州鎮

于鄴鎮南大將軍劉宏領荊州以鎮南土周馥繆盾各
還本部百官皆復職齊王冏前應還第長沙王乂輕陷
重刑封其子紹為樂平縣王以奉其嗣自頃戎車屢征
勞費人力供御之物皆減三分之二戶調田租三分減

一蠲除苛政愛人務本清通之後當還東京

晉書
北堂書鈔
詔

云天禍晉祚家嗣莫繼
驚軫弗禦禁軍莫衛

琅邪王睿通直詔

散騎常侍琅邪王睿日新匪懈宜在機近其令睿通直

也

董猛封武安侯詔

永平元年

中侍董猛固讓封邑其封武安侯

晉惠帝起居注

張華為中書監詔

永平元年

華前任中書有思謀之勤機密之要宜得其才以華為

中書監加侍中

王隱晉書

張華儀同三司詔

元康元年

中書監光祿大夫張華歷世腹心情所憑賴故疇其勲

績使儀同三司而虛沖挹損難違高尚其以為光祿大

夫儀同三司本職如故

晉起居注

追復張華爵位詔

華為趙王倫所害倫誅詔令羣官通議多稱其冤宜復爵

位太安二年下詔

夫愛惡相攻佞邪醜正自古而有故司空壯武公華竭其忠貞思翼朝政謀謨之勲每事賴之前以華弼濟之功宜同封建而華固讓至于八九深陳大制不可得爾終有顛敗危辱之慮辭義懇誠足勸遠近華之至心誓

於神明華以伐吳之勲受爵於先帝後封既非國體又不宜以小功踰前大賞華之見害俱以奸逆圖亂濫被枉賊其復華侍中中書監司空公廣武侯及所沒財物與印綬策遣使弔祭之

給周處母詔

永平七年

處母年老加以遠人朕每愍念給其醫藥酒米賜以終

年

並晉書

王渾錄尚書事詔

元康元年

司徒王渾秉德中正器量宏遠歷位外內文武勲庸著
在方策宜參弼機衡以亮天工其可錄尚書事

晉起居注 秉

德中正書鈔作秉
法從正器一作思

王戎開府詔

元康元年 戎字濬沖
琅邪臨沂人 終司徒

尚書僕射光祿大夫王戎清虛履道謀猷沖遠敷歷外
任宣力四方入掌機衡官才允叙將澄清風俗顯一羣
望宜崇其職乃可贊成王化其以光祿大夫開府儀同

三司

王隱晉書 晉起居注詔云光祿大夫王
戎光祿大夫裴楷開府辟召議同三司

王戎領吏部詔

元康元年

夫興治成務要在官人銓管之為任不可假授侍中中書令光祿大夫王戎經德靜正鑒識明遠其以戎領吏

部

晉起居注

王戎為尚書令詔

永寧元年惠帝反官以戎為尚書令太平御覽作太熙

元年

夫總百揆之得失管王政之開塞者端右之職也是以自漢代以來每選此官必慎其人議郎王戎可為尚書

令 晉書

楊超為騎都尉詔 永寧初

舅氏失道宗族隕墜渭陽之思孔懷感傷其以務亭侯

楊超為奉朝請騎都尉以慰蓼莪之思焉 並晉書

封石苞孫詔 元康元年

故樂陵公石苞國祚莫繼其特以苞孫行為樂陵公

封王基孫詔

司空王基爵祚再絕其以故安陽令振次男恢紹爵 並晉

起居注

復位詔

永寧元年正月趙王倫篡位遷帝于金墉城是年四月倫誅復位

朕以不德纂承皇統遠不能光濟大業靖綏四方近不能開明刑威式遏姦宄至使逆臣孫秀敢肆凶虐窺問王室遂奉趙王倫襲據天位鎮東大將軍齊王冏征北大將軍成都王穎征西大將軍河間王顥竝以明德茂親忠規允著首建大策匡救國難尚書灌共立大謀左衛將軍王興與羣公卿士協同謀畧親勒本營斬秀及

其二子前趙王倫為秀所誤與其子等已詣金墉迎朕
幽宮旋軫閭闔豈在余一人獨饗其慶宗廟社稷實有
賴焉

討劉興詔

永安二年十月興字慶孫中山魏
昌人張昌之亂劉喬為豫州刺史東

海王越

以范陽王毓領豫州喬距之興時為

潁川太守晚於越喬表列興罪惡河間王顥

乃宣詔使劉宏等併力攻越於許昌與弟琨

率眾救越未至越敗後為東海王越長史

得豫州刺史劉喬檄稱潁川太守劉興迫脅驃騎將軍
越距逆詔令造構凶逆擅劫郡縣合聚兵眾擅用苟晞

為兗州斷截王命鎮南大將軍荊州刺史劉宏平南將軍彭城王繹等其各勒所統徑會許昌與喬并力今遣右將軍張方為大都督統精卒十萬建武將軍呂朗廣武將軍騫猛建威將軍刁默等為軍前鋒共會許昌除興兄弟

同前

前見惠帝紀此見
劉興傳總一詔也

潁川太守劉興迫脅范陽王虓距逆詔命多樹私黨擅劫郡縣合聚兵衆興兄弟昔因趙王婚親擅弄權勢凶

狡無道久應誅夷以遇赦令得全首領小人不忌為惡
日滋輒用苟晞為兗州斷截王命鎮南大將軍宏平南
將軍彭城王繹征東大將軍準各勒所領徑會許昌與
喬并力今遣右將軍張方為大都督督建威將軍呂朗
陽平太守刁默率步騎十萬同會許昌以除興兄弟敢
有舉兵距違王命誅及五族能殺興兄弟送首者封三
千戶縣侯賜絹五千匹

青簡詔

張方之亂逼上出謁宗廟上以青簡詔勅中書

體中不佳不堪出也

晉八王故事

追復愍懷太子適冊文

賈后既誅冊復太子迎太子喪於許昌又為哀

冊謚

愍懷

皇帝使使持節兼司空衛尉伊策故皇太子之靈曰嗚呼維爾少負歧嶷之質荷先帝殊異之寵大啓土宇奄有淮陵朕奉遵遺旨越建爾儲副以光顯我祖宗祇爾德行以從保傳事親孝敬禮無違者而朕昧于凶構致爾于非命之禍俾申生孝已復見於今賴宰相賢明人

神憤怨用啓朕心討厥有罪咸伏其辜何補於荼毒冤
魂酷痛哉是用忉怛悼恨震動於五内今追復皇太子
喪禮反葬京畿祠以太牢蒐而有靈尚獲爾心

喪禮王
應晉書

有備至
二字

告愍懷太子哀策文

皇帝臨軒使洗馬劉務告于皇太子之殯曰咨爾適幼
稟英挺芬馨誕茂既表髣髴高明逸秀昔爾聖祖嘉爾
淑美顯詔仍崇名振同軌是用建爾儲副永統皇基如

何凶戾潛構禍害如茲哀感和氣痛貫四時嗚呼哀哉
爾之降廢寔我不明牝亂沈裁釁結禍成爾之逝矣誰
百其形昔之申生含枉莫訟今爾之負抱冤于東悠悠
有識孰不哀慟壺關干主千秋悟已異世同規古今一
理皇孫啓建降祚爾子雖悴前終庶榮後始宅宇既營
將寧爾神華髦電逝戎車雷霆芒芒羽蓋翼翼縉紳同
悲等痛孰不酸辛庶光來葉永世不泯

並晉書

齊王冏復封冊

永興初以冏有誅賈后復惠帝之勲輕陷重刑乃封子超為縣

王以繼同祀光

熙初追冊同

卷三

咨故大司馬齊王罔王昔以宗藩穆肩紹世緒于東國
作翰許京允鎮靜戎王室誕率義徒同盟觸澤克成元
勲大濟賴東朕用應嘉茂績謂篤爾勞俾式先典以疇
茲顯懿廓土殊分跨兼吳楚崇禮備物寵侔蕭霍庶憑
翼戴之重永隆邦家之望而恭德不建取侮二方有司
過舉致王于戮古人有言曰用其法猶思其人況王功
濟朕身勲存社稷追惟既往有悼於厥心哉今復王本

封命嗣子還紹厥緒禮秩典度一如舊制使使持節大鴻臚即墓賜策祠以太牢寃而有靈祇服朕命肆寧爾

心嘉茲寵榮

並晉書

何攀封西城公策

攀字惠興蜀郡郫人為翊軍校尉誅楊駿策封

於戲在昔先王光濟厥世罔不開國列土建德表功也故逆臣楊駿謀危社稷構兵飛矢集于殿庭白刃交於宮闈攀受命奮討凶逆速殄忠烈果毅朕甚嘉焉今以魏興之西城為攀封國錫茲立社苴以白茅永為晉藩

輔往欽哉敬乃有土惠康黎元無或以隳爾顯烈

華陽國志

贈汧督馬敦策書

敦與氏賊齊萬年力戰存汧為州司所誣入獄以梁王彤

疏理
追贈

皇帝咨故督守關中侯馬敦忠勇果毅率勵有功固守

孤城危逼獲濟寵秩未加不幸喪亡朕用悼焉今追贈

牙門將軍印綬祠以少牢蒐而有靈嘉茲寵榮

見潘岳馬汧督

誄北堂書鈔載齊王九錫文集減
凶醜罪人斯得是用錫君鉄鉞各一

懷帝

名熾字豐度武帝第二十五子封豫章郡王立為皇太弟惠帝崩嗣位五年洛京陷為劉

聰執歸平陽封
會稽公見就

劉寔以侯就第詔

懷帝即位寔授太尉自陳年老固辭不許左丞劉坦上言

宜聽寔所

守詔曰

昔虞任五臣致垂拱之化漢相蕭何興寧一之譽故能
允隆於當時垂裕於百代朕紹天明命臨御萬邦所以
崇顯政道者亦賴之於元臣庶尹畢力股肱以副至望
而君年耆告老確然難違今聽君以侯就第位居三司
之上秩祿準舊賜几杖不朝及宅一區國之大政將就

詔于君副朕意焉

詔苟晞

晞初為北軍中候行兗州刺史東海王越為太傅輔政命晞破汲桑定鄴立諸

戰功越以司馬潘滔等謀還晞領青州刺史已滔等又共誣陷晞晞乃移告諸州稱已功

伐陳越罪狀時懷帝惡越專權詔晞

朕以不德戎車屢興上懼宗廟之累下愍兆庶之困當
賴方岳為國藩翰公威振赫然梟斬藩桑走降喬朗魏
植之徒復以誅除豈非高識明斷朕用委成加王彌石
勒為社稷之憂故有詔委統六州而公謙分小節稽違

大命非所謂與國同憂也今復遣詔便施檄六州協同
大舉翦除國難稱朕意焉

又手詔

永嘉五年復詔晞討越越
出牧豫州以討晞會越薨

太傅信用姦佞阻兵專權內不遵奉皇憲外不協比方
州遂令戎狄充斥所在犯暴留軍何倫抄掠宮寺劫剝
公主殺害賢士悖亂天下不可忍聞雖惟親親宜明九
伐詔至之日其宣告天下率齊大舉桓文之績一以委
公其思盡諸宜善建宏畧道澀故練寫副手筆示意

並晉

書

愍帝

名鄴字彥旗武帝孫吳王晏之子繼伯父封秦王懷帝被執為皇太子入長安即帝位四

年劉曜陷長安出降封懷安侯見弑而西晉亡

詔瑯琊王睿南陽王保

愍帝即位以睿為左丞相大都督陝東保為右

丞相大都督陝西詔二王又詔瑯琊睿即元帝保字景度襲父封歷位相國愍帝陷自

稱晉

王

夫陽九百六之菑雖在盛世猶或遘之朕以幼冲纂承洪緒庶憑祖宗之靈羣公義士之力蕩滅凶寇拯拔幽

宮瞻望未達肝心分裂昔周邵分陝姬氏以隆平王東
遷晉鄭為輔今左右丞相茂德齊聖國之昵屬當恃二
公掃除鯨鯢奉迎梓宮克復中興令幽并兩州勒卒三
十萬直造平陽右丞相宜帥秦涼梁雍武旅三十萬徑
詣長安左丞相帥所領精兵二十萬徑造洛陽分遣前
鋒為幽并後駐赴同大限克成元勲

又詔瑯琊王睿

朕以冲昧纂承洪緒未能梟夷凶逆奉迎梓宮枕戈煩

寃肝心抽裂前得魏浚表知公帥先三軍已據壽春傳檄諸侯協齊威勢想今漸進已達洛陽涼州刺史張軌乃心王室連旗萬里已到汧隴梁州刺史張光亦遣巴漢之卒屯在駱谷秦川驍勇其會如林間遣使適還具知平陽定問云幽并隆盛餘胡衰破然猶恃險當須大舉未知公今所到是以息兵秣馬未便進軍今為已至何許當須來音便乘輿自出會除中原也公宜思宏謀猷勗濟遠畧使山陵旋反四海有賴故遣殿中都督劉

蜀蘇馬等具宣朕意公茂德昵屬宣隆東夏恢融六合
非公而誰但洛都陵廟不可空曠公宜鎮撫以綏山東
右丞相當入輔弼追蹤周邵以隆中興也

督一作尉

平東將軍宋哲宣詔

元帝建武元年二月哲至宣詔羣臣請上尊號不許

進位

晉王

時遭屯否皇綱不振朕以寡德奉承洪緒不能祈天永
命紹隆中興至使外寇敢帥師旅逼迫京輦朕今幽塞
窮城憂慮萬端恐一旦崩潰卿指諸丞相具宣朕意使

攝萬機時據舊都修復陵廟以雪大恥

並晉書

張軌進封西平公詔

惠帝時軌據有涼州因授涼州刺史會懷帝遷於平

陽愍帝時為秦王軌檄兵勤王及即位詔軌進爵梁州牧西平郡公軌固讓不受

朕以寡昧纂承大統未能梟除凶逆奉迎梓宮枕戈含

冤肝心碎裂惟爾涼州刺史張軌乃心王室旌旗連絡

萬里星赴進次濟隴便當協力濟難恢復神州故遣中

常侍蘇馬拜爾為鎮西大將軍開府儀同三司加侍中

封西平郡公

十六國春秋前涼錄

張寔授西平公策書

寔為軌子嗣攝父位建興二年下詔

維乃父武公著勲西夏頃胡賊狡猾侵逼近甸義兵銳
卒萬里相尋方貢遠珍府無虛歲方委專征蕩清九域
昊天不弔凋余藩后朕用悼厥心維爾雋劬英毅宜世
表西海今授持節都督涼州諸軍事西中郎將涼州刺
史領護羌校尉西平公往欽哉其闡宏先緒俾屏王室

前涼錄句作畿劬作
勲今校下有使字

臨降下張寔詔

愍帝特降劉曜下詔寔
以天子蒙塵沖讓不拜

天步厄運禍降晉室京師傾陷先帝晏駕賊庭朕流漂
宛許爰暨舊京羣臣以宗廟無主歸之於朕遂以冲眇
之身託于王公之上自踐寶位四載于茲不能剪除巨
寇以救危難元元兆庶仍遭塗炭皆朕不明所致羯賊
劉載僭稱大號禍加先帝肆殺藩王深惟仇恥枕戈待
旦劉曜自去年九月率其蟻衆乘虛深寇劫質羌胡攻
沒北地麴允總戎在外六軍敗績侵逼京師矢流宮闕
胡松等雖赴國難殿而無効圍塹十重外救不至糧盡

人窮遂為降虜仰慙乾靈俯痛宗廟君世篤忠亮勲隆
西夏四海具瞻朕所憑賴今進君大都督涼州牧侍中
司空承制行事瑯琊王宗室親賢遠在江表今朝廷播
越社稷倒懸朕以詔王時攝大位君其挾贊瑯琊共濟
艱運若不忘主宗廟有賴明便出降故夜見公卿屬以
後事密遣黃門郎史淑侍御史王冲齋詔假授臨出寄
命公其勉之

索綝領太尉詔

綝懷帝時為西州太守長安陷
糾義破賊協立愍帝歷遷尚書

右僕射
尋又詔

朕昔遇厄運遭家不造播越宛楚爰失舊京幸宗廟寵
靈百辟宣力得從藩衛託乎羣公之上社稷之不隕實
公是賴宜贊百揆傳弼朕躬其授衛將軍領太尉位特
進軍國之事悉以委之

並晉書

寒食散論

世說注秦丞相寒食散論按愍
帝封秦王為丞相疑是附此

寒食散之方雖出漢代而用之者寡靡有傳焉魏尚書
何晏首獲神效由是大行於世服者相尋也

西晉文紀卷三

欽定四庫全書

西晉文紀卷四

明梅鼎祚編

西晉四

武帝左貴嬪

名芬齊國臨淄人秘書郎思之妹少好學善綴文名亞於思武帝納為貴

嬪以才德見稱帝重芬辭藻方物異寶必詔為賦頌有集四卷

獻武元楊皇后誄表

晉書

伏惟聖善宣慈仁洽六宮含弘光大德潤四海妾聞之前志卑不誄尊少不誄長楊雄臣也而誄漢后班固子

也而誄其父皆以述揚景行顯之竹帛豈所謂三代不同禮隨時而作者乎

元皇后誄

惟泰始十年秋七月景寅晉元皇后楊氏崩嗚呼哀哉昔有莘適殷姜如歸周宣德中闡徽音永流樊衛二姬匡齊翼楚馬鄧兩妃亦毘漢主戢戢元后光嬪晉室伉儷聖皇比蹤往古遭命不永背陽即陰六宮號咷四海慟心嗟予鄙妾銜恩特深追慕三良甘心自沈何用存

思不忘德音何用紀述託辭翰林乃作誄曰

赫赫元后出自有楊奕世朱輪耀彼華陽惟嶽降神顯
茲禎祥篤生英媛休有烈光含靈握文異於庶姜和暢
春日操厲秋霜疾彼攸遂敦此義方率由四教匪怠匪
荒行周六親徽音顯揚顯揚伊何京室是臧乃娉乃納
聿嬪聖皇正位閨闕惟德是將鳴佩有節發言有章仰
觀列圖俯覽篇籍顧問女史咨詢竹帛思媚皇姑虔恭
朝夕允釐中饋執事有恪於禮斯勞於敬斯勤雖曰齊

聖邁德日新日新伊何克廣弘仁終溫且惠帝妹是親
經緯六宮罔不彌綸羣妾惟仰譬彼北辰亦既青陽鳴
鳩告時躬執桑曲率導媵姬修成蠶簇分繭理絲女工
是祭祭服是治祇奉宗廟永言孝思於彼六行靡不蹈
之皇英佐舜塗山翼禹惟衛惟樊二霸是輔明明我后
異世同矩亦能有亂謀及天府內敷陰教外毘陽化綢
繆庶政密勿夙夜思從風翔澤隨雨播中外禔福遐邇
詠歌天祚貞吉克昌克繁則百斯慶育聖育賢教踰姪

如訓邁姜嫄堂堂太子惟國之元濟濟南陽為屏為藩
本枝菴藹四海陰焉徹斯皇妣孰茲克臻曰乾蓋聰曰
聖允誠積善之常五福所并宜享高年匪隕匪傾如彭
之齒如聃之齡云胡不造丁茲禍殃寢疾彌留寤寐不
康亟咸騁術和鵲奏方祈禱無應嘗藥無良形神既離
載昏載荒奄忽崩徂湮精滅光哀哀太子南陽繁昌攀
援不寐擗踴摧傷嗚呼哀哉闔宮號咷宇內震驚奔者
填衢赴者塞庭哀慟雷駭流淚雨零歔歔不已若喪所

生惟帝與后契濶在昔比翼白屋雙飛紫閣悼后傷后
早即窀穸言斯既及涕泗隕落追惟我后寔聰實哲通
於性命達於儉節送終之禮比素上世祔無珍寶吟無
明月潛輝梓宮永背昭晰臣妾哀號同此斷絕庭宇過
密幽室增陰空設帷帳虛置衣衾人亦有言神道難尋
悠悠精爽豈浮豈沈豐奠日陳冀魂之臨孰云元后不
聞其音乃議景行景行已溢乃考龜筮龜筮襲吉爰定
宅兆克成玄室魂之往矣於以今日仲秋之辰啓明始

出星陳夙駕靈輿結駟其輿伊何金根玉箱其駟伊何
二駱雙黃習習容車朱服丹章隱隱轡軒弁綬總裳華
韞曜野素蓋被原方相伋伋旌旒翻翻輓童引歌白驥
鳴轅觀者夾塗士女涕漣千乘萬騎迄彼峻山峻山
峩曾阜重阿弘高顯敞據洛背河左瞻皇姑右睇帝家
推存揆亡明神所嘉諸姑姊妹娣如媵御追送塵軌號
咷衢路王侯卿士雲會星布羣官庶僚縞蓋無數咨嗟
通夜東方云曙百祗奉迎我后安厝中外俱臨同哀並

慕涕如連雲淚如湛露扃閨既闔窈窕冥冥有夜無晝
曷用其明不封不樹山坂同形昔后之崩大火西流寒
往暑過今亦孟秋自我銜卹儵忽一周衣服將變痛心
若抽逼彼禮制惟以增憂去此素衣結戀靈邱有始有
終天地之經自非三光誰能不零存播令德沒圖丹青
先哲之志以此為榮溫溫元后實宣慈焉撫育羣生恩
惠滋焉遺愛不已永見思焉懸名日月垂萬春焉嗚呼
庶妾感四時焉言思言慕涕漣漣焉

教一作執羣妾作
琴妾祇奉作祇承

蒼露作曉露和鶴作扁鶴祈禱作祈福將離作既離載
昏作情氣實作瑤背河作依河並慕作共慕連雲作連
雨已
作忘

萬年公主誄

晉書左貴嬪傳武帝女萬年公主
薨痛悼不已詔芬為誄其文甚麗

昔蒲衣早智周晉夙成咸以岐嶷名存典經猗歟公主
在幼克哲方德比齒有邈先烈何德之盛而年或闕何
華之繁而實不結雨墜風逝形影長滅赤赤京室河洛
所經陰精發曜降茲淑靈篤生公主誕膺休禎秀生紫
微日暉月明既睇艷姿徽音孔昭眇倩其媚婉曼其嬌

寵玩軒陛如瓊如瑤雖則弱齒雙德兼苞五福所集聞
之先民積善鍾慶祐德輔仁宜終淑美光暉日新云何
降戾景命不振晔晔榮曜英蕤始芳何辜於天猥遇降
霜煢煢稚魂飄飄遐翔於戲何辜痛茲不福生而何晚
沒而何速酷矣皇靈謬哉司祿嗚呼哀哉日月載馳白
露凝結自主薨祖奄離時節吉凶乖邈存亡異制將遷
幽都潛神永翳嗚呼公主魂豈是綏岌岌靈輅駟駟
駟挽僮齊唱悲音激推士女歔歔高風增哀一日不見

採蕭作歌況我公主形滅體訛精靈遷逝幽此中阿言
思言念涕淚滂沱嗚呼哀哉

虞舜二妃贊

妙矣二妃體靈應符奉嬪於媯光此有虞沅湘示教靈
德永敷惟斯善美諒無泯乎

周宣王姜后贊

昭昭宣王克復前制疊疊姜后乃激乃厲執心至公以
恢明世

荆武王夫人鄧曼贊

天道惡盈極數則微邈哉鄧曼心映禍幾覩兆嘆亡考
德知衰賢哉卓殊邈哉難追

魯敬姜贊

邈矣敬姜含德之英于行則高于理斯明垂訓于宗厲
發奇聲宣尼三嘆萬代遺馨

齊義繼母贊

聖教立化禮貴信誠至哉繼母行合典經不遺宿諾義

割斯情表德來裔垂則後生

齊杞梁妻贊

遭命不改逢時險屯夫卒莒場郊弔不賓哀崩高城訴

情穹旻遂赴淄川託軀清津

軀一作身

楚狂接輿妻贊

接輿高潔懷道行謠妻亦冰清同味玄昭遺俗榮津志

遠神遼

孟軻母贊

鄒母善導三徙成教鄰止庠序俎豆是效斷織激子廣
以墳奧聰達知禮敷述聖道

班婕妤贊

恂恂班女恭讓謙虛辭輦進賢辨祝理誣形圖丹青名
侔樊虞

巢父惠施贊

泱泱長流沔沔清波思文巢惠再詠再歌垂綸一壑萬
象匪多神乎暢矣緬同基阿

德剛贊

溫溫德剛實秉道純履此聖義體此敦仁篤物博好靡
踈靡親九族懷附邦邑望塵貴實賤華尚素安貧雖在
崇高必若平民匪道之榮譬之生民褒飾之譽謂之謗
身惟義是存惟道是尊

德柔贊

藝文類聚
一作頌

邈邈德柔越天之剛神以知來智以藏往

疑遺
四字

含純溥

生允矣君子展也大成執德純粹岳峻川渟履行高厲

蕩乎其平敦興聖道率正不傾令聞不已載路厥聲

納楊后贊

清和協極二儀降靈啓茲楊族仁哲誕生徽音內發有
馥其馨玄符表運作合聖明文定厥祥考卜惟貞良辰
納幣三光朗清元公執贄嘉禮告成卿士庶僚爛其充
庭赫赫華宗奕世載榮謙光其尊在滿戒盈受茲介福

垂祚億齡

並藝文
類聚

武悼楊皇后頌

晉書武帝咸寧二年納悼后芬
於坐受詔作頌元后從妹弘農

華陰人

我我華嶽峻極泰清巨靈導流河瀆是經惟瀆之神惟
嶽之靈鍾于楊族載育盛明穆穆我后應期挺生含聰
履詰岐嶷夙成如蘭之茂如玉之瑩越在幼沖休有令
名飛聲八極翕習紫庭超任邈如比德皇英京室是嘉
備禮致娉令月吉辰百僚奉迎周生歸韓詩人是詠我
后戾止車服輝映登位太微明德日盛羣黎欣戴函夏
同慶翼翼聖皇獻詰孔純愍茲狂戾闡惠播仁躅躅滌

穢與時惟新沛然洪赦恩詔遐震后之踐祚圉圉虛陳
萬國齊歡六合同欣坤神抃僂天人載悅興瑞降祥表
精日月和氣煙煥三光朗烈既獲嘉時尋播甘雪玄雲
晻霭靈液霏霏既儲既積待陽而晞瞻睨沾濡榮潤中
畿長享豐年福祿永綏

穆穆我后一作我后穆穆履詰作體詰狂戾作冠羸

鬱金頌

伊此奇草名曰鬱金越自殊域厥珍來尋芬香酷烈悅
目怡心明德惟馨淑人是欽窈窕妃媛服之褊衿永垂

名實曠世弗沈

藝文類聚

惠帝賈皇后

字南風太宰充女淫虐不道為趙王倫所誅廢為庶人

太子過葬禮表

賈后既廢太子矯詔殺之將以庶人禮葬偽為表聞詔葬以廣

禮陵王

適不幸喪亡傷其迷悖又早短折悲痛之懷不能自己
妾私心冀其刻肌刻骨更思孝道規為稽顙正其名號
此志不遂重以酸恨適雖罪在莫大猶王者子孫便以
匹庶送終情實憐愍特乞天恩賜以王禮妾誠闇淺不

識禮義不勝至情冒昧陳聞

愍懷太子通

字熙祖惠帝長子母謝夫人玖進淑媛及太子遇酷政亦被害

遺妃王惠風書

賈后將廢太子許稱上不和呼太子入朝既至賜以酒漿逼醉

使黃門侍郎潘岳作書草若禱神之文有如太子素意以紙筆使太子書之太子醉迷不覺其字半不成補成之后呈惠帝帝幸式乾殿以太子書青紙詔曰通書如此今賜死漏示諸公王惟張華裴頠申救太子后懼事變乃表免為庶人送金墉城妃父衍表請離婚太子至許遣妃書明年復以太子為逆幽于許昌宮之別坊使黃門孫慮殺之妃後為劉曜執賜其將不屈死

鄙雖煩愚心念為善欲盡忠孝之節無有惡逆之心雖
非中宮所生奉事有如親母自為太子以來勅見禁檢
不得見母自宜城君亡不見存恤恒在空室中坐去年
十二月道文疾病困篤父子之情實相憐愍于時表國
家乞加徽號不見聽許疾病既篤為之求請恩福無有
惡心自道文病中宮三遣左右來視云天教呼汝到二
十八日暮有短巫來題言東宮發疏云言天教欲見汝
即便作表求入二十九日早入見國家須臾遣至中宮

中宮左右陳舞見語中宮旦來吐不快使住空室中坐
須臾中宮遣陳舞見語聞汝表陛下為道文乞王不得
王是成國耳中宮遙呼陳舞昨天教與太子酒棗便持
三升酒大盤棗來見與使飲酒噉棗盡鄙素不飲酒即
便遣舞啓說不堪三升之意中宮遙呼曰汝常陛下前
持酒可喜何以不飲天與汝酒當使道文差也便答中
宮陛下會同一日見賜故不敢辭通日不飲三升酒也
且實未食恐不堪又未見殿下飲此或至顛倒陳舞復

傳語曰不孝那天與汝酒飲不肯飲中有惡物邪遂可
飲二升餘有一升求持還東宮飲盡逼迫不得已更飲
一升飲已體中荒迷不復自覺須臾有一小婢持封箱
來云詔使寫此文書鄙便驚起視之有一白紙一青紙
催促云陛下停待又小婢承福持筆研墨黃紙來使寫
急疾不容復視實不覺紙上語輕重父母至親實不相
疑事理如此實為見誣想衆人見明也

賈后母郭槐充
之妻封宜城君

彪字道文

太子長子

潘岳詐愍懷太子書

陛下宜自了不自了吾當入了之中宮又宜速自了不
了吾當手了之并謝妃共要尅期而兩發勿疑猶豫致
後患茹毛飲血於三辰之下皇天許當掃除患害立道
文為王蔣為內主願成當三牲祠北君大赦天下要疏
如律令

並晉書

安平獻王孚

字叔達宣帝次弟仕魏歷太宰

請造沁水石門表

水經注晉安平王孚為魏野王典農中郎將所造詔書聽

許

臣孚言臣被明詔興河內水利臣既到檢行沁水源出
銅鞮山屈曲周迴水道九百自太行以西王屋以東層
巖高峻天時霖雨衆谷走水小口漂迸木門朽敗稻田
汎濫歲功不成臣輒按行去堰五里以外方石可得數
萬餘枚臣以為方石為門若天亢旱增堰進水若天霖
雨陂澤充溢則閉石斷水空渠衍澇足以成河雲雨由
人經國之謀暫勞永逸聖王所許願陛下特出臣表勅

大司農府給人工勿使稽延以贊時要臣孚言

魏明帝悼后書銘旌議

或欲去姓而書魏或欲兩書字議從之

經典正式皆不應書凡帝王皆因本國之名以為天下之號而與往代相別耳非為擇美名以自光也天稱皇天則帝稱皇帝地稱后土則后稱皇后此乃所以同天地之大號流無二之尊名不待稱國號以自表不俟稱氏族以自彰是以春秋隱公三年經曰三月庚戌天王崩尊而稱天不曰周王者所以殊乎列國之君也八月

庚辰宋公和卒書國稱名所以異乎天王也襄公十五年經曰劉夏逆王后於齊不云逆周王后姜氏者所以異乎列國之夫人也至于列國則曰夫人姜氏至自齊又曰紀伯姬卒書國稱姓此所以異乎天王后也由此考之尊稱皇帝赫赫無二何待於魏乎尊稱皇后彰以謚號何待於姓乎議者欲書魏者此以為天皇之尊同於往古列國之君也或欲書姓者此以為天皇之后同於往古之夫人也垂經典之大義異乎聖人之明制非

所以垂訓將來為萬世不易之武者也

上武帝除喪復常奏

文帝崩武帝既葬除喪深衣素冠降席撤膳太宰司

馬孚太傅鄭沖太保王祥太尉何曾司徒領中領軍司馬望司空荀顗車騎將軍賈充尚

書令裴秀尚書僕射武陉都護大將軍郭建侍中郭綏中書監荀勗中軍將軍羊祜等奏

臣聞禮典軌度豐殺隨時虞夏商周咸不相襲盖有由也夫晉紹承漢魏有革有因期於足以興化致治而已故未得皆返太素同規上古也陛下既以俯遵漢魏降喪之典以濟時務而躬蹈大孝情過乎哀素冠深衣降

席撤膳雖武丁行之於殷世曾閔履之於布衣未足以
喻方今荆蠻未夷庶政未乂萬機事殷動勞神慮豈遑
全遂聖旨以從至情加歲時變易期運忽過山陵彌遠
攀慕永絕臣等以為陛下宜回慮割情以康時濟治輒
勅御府易服內省改坐太官復膳諸所施行皆如舊制

濟治晉書
作濟俗

武帝詔答

每感念幽冥而不得終其經於草土以存此痛況當食

稻衣錦誠倬然激切其心非所以相解也吾本諸生家
傳禮來久何心一旦便易此情於所天相從已多可試
省孔子答宰我之言無事紛紜也言及悲剝奈何奈何
悲剝晉書
作悲殺

重奏

伏讀聖詔感以悲懷輒思仲尼所以抑宰我之問聖思
所以不能以已已甚深甚篤然今以干戈未戢武事未
偃萬機至重天下至衆陛下以萬乘之尊履布衣之禮

服麤席藁水飲蔬食殷憂內盈毀悴外表然而躬勤萬
機坐而待旦降心接下仄不遑食所以勞力者如斯之
甚是以臣等悚息不寧誠懼神氣用損以疚大事輒勅
有司改坐復常率由舊典惟陛下察納愚款以慰皇太
后之心

今以晉書
作今者

又詔答

帝遂以此禮終三年
後居太后喪亦如之

重覽奏議益以悲剝不能自勝奈何奈何三年之喪自
古達禮誠聖人稱心立哀明恕而行也神靈日遠無所

告訴雖薄於情食旨服美朕更所不堪也不宜反覆重

傷其心言用斷絕奈何奈何

宋書 心晉作
情告訴作訛告

遺令

晉書

有魏貞士河內溫縣司馬字叔達不伊不周不夷不
惠立身行道終始如一當以素棺單槨歛以時服

瑯邪王 仙

字子將
宣帝子

薦山簡表

仙時為鎮
東大將軍

從事中郎缺用第三品中散大夫河內山簡清精履正

才職通濟品儀第二也

北堂書鈔

梁王彤

字子徽宣帝第八子歷丞相太宰領司徒為宗師

理汧督馬敦疏

彤時為征西大將軍上疏詳前策書見潘岳誄

敦固守孤城獨當羣寇以少禦衆載離寒暑臨危奮節保穀全城而雍州從事忌敦勲效推極小疵非所以褒獎元功宜解敦禁劾假授

齊王攸

字大猷文帝次子仕魏衛將軍武帝踐阼封齊王出都督青州

藩國自除長吏議

時詔議藩王令自選國內長吏攸奏議不許

昔聖王封建萬國以親諸侯軌迹相承莫之能改誠以君不世居則人心偷幸人無常主則風俗偽薄是以先帝深覽經遠之統思復先哲之軌分土畫疆建爵五等或以進德或以酬功伏惟陛下應期創業樹建親戚聽使藩國自除長吏而今草創制度初立雖庸蜀順軌吳猶未賓宜俟清泰乃議復古之制

務農重本議奏

詔以比年饑饉議所節省攸奏議

臣聞先王之教莫不先正其本務農重本國之大綱當

今方隅清穆武夫釋甲廣分休假以就農業然守相不能勤心恤公以盡地利昔漢宣嘆曰與朕理天下者惟良二千石乎勤加賞罰黜陟幽明於時翕然用多名守計今地有餘羨而不農者衆加附業之人復有虛假通天下之謀則饑者必不少矣今宜嚴勅州郡檢諸虛詐害農之事督實南畝上下同奉所務則天下之穀可復古政豈患於暫一水旱便憂饑餒哉考績黜陟畢使嚴明畏威懷惠莫不自厲又都邑之內游食滋多巧伎末

業服飾奢麗富人魚美猶有魏之遺弊染化日淺靡財
害穀動復萬計宜申明舊法必禁絕之使去奢即儉不
奪農時畢力稼穡以實倉廩則榮辱禮節由之而生興
化反本於茲為盛

選長史令

國長吏缺典書請
求差選攸下令

忝受恩禮不稱惟憂至於官人敘才皆朝廷之事非國
所宜裁也其令自上請之

議按吏教

夫先王馭世明罰勅法鞭扑作教以正通慢且唐虞之
朝猶須督責前欲撰次其事使麤有常懼煩簡之宜未
審其要故令劉程二君詳定然思惟之鄭鑄刑書叔向
不遵范宣議制仲尼譏之令皆如舊無所增損其常節
度所不及者隨事處決諸吏各竭乃心思同在公古人
之節如有所闕以賴股肱匡佐之規庶以免負

太子箴

惠帝為太子攸授太子太傅
獻箴藝文作太傅箴誤

伊昔上皇建國立君仰觀天文俯察地理創業恢道以

安人承祀祚延統重故援立太子尊以弘道固以貳已
諸德既立邦有所恃夫親仁者功成邇佞者國傾故保
相之材必擇賢明昔在周成旦奭作傅外以明德自輔
內以親親立固德以義濟親則自然羸廢公族其崩如
山劉建子弟漢祚永傳楚以無極作亂宋以伊戾興難
張禹佞給卒危強漢輔弼不忠禍及乃躬匪徒乃躬乃
喪乃邦無曰父子不間昔有江充無曰至親匪貳或容
潘崇諛言亂真譖潤離親驪姬之讒晉侯疑申固親以

道勿固以恩脩身以敬勿託以尊自損者有餘自益者

彌昏庶事不可以不恤大本不可以不敦見亡戒危觀

安思存家子司義敢告在閤

並晉書 藝文類聚王虞保傳歲云保傳賢明宗國

用寧輔佐不忠禍及於躬無曰父子無間乃有潘崇無曰父子無二或容江充志不可解思不當恃一藥不當罪歸許止一時不待惡延宗子

與山濤書

中庶子東宮顯職加侍接左右誠宜得薦粹有行檢之

人想悉在尊意必允衆望也

藝文類聚

又

洗馬今之清選前後選文書才義也

又與清書舍人今之清選也

又

武長嗣薦敏有器思今東宮洗馬缺

闕

又

太子舍人夏侯湛秉心居正理識明徹應可郎也

並北堂書

鈔

汝南王亮

字子翼宣帝第四子歷太宰錄尚書為楚王瑋所害自汝南至東海八王皆

亂晉而不得其死晉書別
為序傳又別有八王故事

日蝕上言

太康七年正月旦日食亮
與司徒舒司空璿上言

三司之任天地人也乾道不普故水旱為菑人倫失敘
故奸兇不禁乃者荊州之城妖菑仍興任城國都水流
變赤近三朝之始日有蝕之孟陽節過堅冰未消臣等
瑣才叨據高位可謂小人而乘君子之器宜就顯戮以
答天意謹免冠徒跣上所假章綬

武帝詔報

夫陰陽失序朕干天道刑政失中之所致也其使冠履

勿復通表

八王故事

楚王瑋

字彥度武帝第五子歷衛將軍加侍中為賈后所害

告諸軍討汝南王亮太保衛瓘于令

瑋性狠戾汝南王亮

太保衛瓘議使之國其長史矯稱瑋命詣於賈后使惠帝為詔害二公瑋又矯詔赦亮瓘

官屬后先惡亮瓘且忌瑋復以瑋矯制收斬之

天禍晉室凶亂相仍間者楊駿之難實賴諸君克平禍亂而二公潛圖不軌欲廢陛下以絕武帝之祀今軌奉

詔免二公官吾今受詔都督中外諸軍諸在直衛者皆嚴加警備其在外營便相率領徑詣行府助順討逆天所福也懸賞開封以待忠效皇天后土實聞此言

矯詔赦亮瑾官屬

二公潛謀欲危社稷今免還第官屬以下一無所問若不奉詔使軍法從事能率所領先出降者封侯受賞朕

不食言

晉書

趙王倫

字子彝宣帝第九子歷右軍將軍誅賈后自為相國侍中以篡誅

偽詔

倫篡位齊王問河間王顥成都王穎起兵討倫衛將軍趙象斬倫黨孫秀使倫為詔

迎惠帝

反正

吾為孫秀等所誤以怒三王今已誅秀其迎太上復位
吾歸老於農畝

齊王冏

字景治齊獻王攸子歷大司馬為長沙王又所害

請立清河王覃為皇太子表

覃本清河王遐子時沖太孫薨冏表

立後
廢死

東宮曠然家嗣莫繼天下大業帝王神器必建儲副以

固洪基今者後宮未有孕育不可庶幸將來而虛天緒
非祖宗之遺志社稷之長計也禮兄弟之子猶子故漢
成無嗣繼由定陶孝和之絕安以紹興此先王之令典
往代之成式也清河王覃神姿岐嶷慧智早成康王正
妃周氏所生先帝衆孫之中於今為嫡昔薄姬賢明文
則承位覃外祖恢世載名德覃宜奉宗廟之重統無窮
之祚以寧四海顒顒之望覃兄弟雖並出紹可簡令淑
還為國胤不替其嗣輒諮大將軍頴及羣公卿士咸同

大願請具禮儀擇日迎拜

理淮南王允表

允為武帝子歷太尉謀誅趙王倫見害倫誅同上表理允

故淮南王允忠孝篤誠憂國忘身討亂奮發幾於剋捷
遭大凶運奄至隕沒逆黨違惡并害三子冤魂酷毒莫
不悲酸洎興義兵淮南國人自相率領衆過萬人人懷
忼愾愍國統滅絕發言流涕臣輒以息超繼允後以慰
存亡

理張華等奏

華虞致書於
周周奏追贈

臣聞興微繼絕聖王之高政貶惡嘉善春秋之美義是以武王封比干之墓表商容之間諫幽明之故有以相通也孫秀逆亂滅佐命之國誅骨鯁之臣以斷喪王室肆其虐戾功臣之後多見泯滅張華裴頠各以見憚取誅於時解系解結同以羔羊並被其害歐陽建等無罪而死百姓憐之今陛下更日月之光布惟新之命然此等諸族未蒙恩理昔藥卻降在阜隸而春秋傳其違幽王絕功臣之後棄賢者子孫而詩人以為刺臣備忝在

職思納愚誠若合聖意可令羣官通議

理解系等奏

系為西戎校尉與孫秀爭軍事有隙諧于趙王倫與其弟結同被害

周起義以裴解為冤首議贈焉

臣聞興微繼絕聖主之高政貶惡嘉善春秋之美談是以武王封比干之墓表商容之閭誠幽明之故有以相通也孫秀逆亂滅佐命之國誅骨鯁之臣以斲喪王室肆其虐戾功臣之後多見泯滅至如張華裴頠各以見憚取誅於時系結同以羔羊被害歐陽建等無罪而死

百姓憐之陛下更日月之光照布惟新之明命然此等
未蒙恩理昔藥卻降在皂隸而春秋傳其人幽王絕功
臣之後棄賢者子孫而詩人以為刺臣備忝右職思竭
股肱獻納愚誠若合聖意可羣官通議

八坐解系等議

系等清公正直為奸邪所疾無罪橫戮冤痛已甚如大
司馬所啓彰明枉直顯宣當否使冤魂無愧無恨為恩
大矣

罪王豹奏

詳王豹下

臣忝奸兇肆逆皇祚顛墜與成都長沙新野共興義兵
安復社稷唯欲勦力皇家與親親宗室腹心從事此臣
夙夜自誓無負神明而主簿王豹比有白事敢造異端
謂臣忝備宰相必違危害慮在一旦不祥之聲可躋足
而待欲臣與成都分陝為伯盡出蕃王上誣聖朝鑒御
之威下長妖惑疑阻衆心嚙啗背憎巧賣兩端訛上謗
下讒內間外違惡導奸坐生猜嫌昔孔邱匡魯乃誅少

正子產相鄭先戮鄧析誠以交亂名實若趙高詭怪之類也豹為臣不忠不順不義輒勅都街考竟以明邪正

並晉書

長沙王乂

字士度武帝第六子歷大都會為東海王越所害

致成都王穎書

初河間王顯將誅齊王冏乂時在洛為驃騎將軍以乂為內主

乂攻冏殺之穎鎮鄴懸執朝政憚乂在內遂與顯同伐京師詔乂為大都督以距顯朝議使中書令王衍等說顯令與乂分陝而居穎不從乂致書穎穎復書乂大破穎軍東海王越潛收乂送金墉城顯將張方稱詔殺之顯表穎立為皇太子

先帝應乾撫運統攝四海勤身苦已克成帝業六合清
泰慶流子孫孫秀作逆反易天常卿與義衆還復帝位
齊王恃功肆行非法上無宰相之心下無忠臣之行遂
其讒惡離逃骨肉主上怨傷尋已蕩除吾之與卿友于
十人同產王室受封外都各不能闡敷王教經濟遠畧
今卿復與太尉共起大衆阻兵百萬重圍宮城羣臣同
忿聊即命將示宣國威未擬推珍自投溝澗蕩平山谷
死者日萬酷痛無罪豈國恩之不慈則用刑之有常卿

所遣陸機不樂受卿節鉞將其所領私通國家想來逆者當前行一尺却行一大卿宜還鎮以寧四海令宗族無羞子孫之福也如其不然念骨肉分裂之痛故復遣

書

顯時為太尉

臨收上表

陛下篤睦委臣朝事臣小心忠孝神祇所鑒諸王承謬率衆見責朝臣無正各慮私困收臣別省送臣幽宮臣不惜軀命但念大晉衰微枝黨欲盡陛下孤危若臣死

國寧亦家之利但恐快凶人之志無益於陛下耳

並晉書

成都王穎

字章度武帝第十六子拜丞相東海王越收捕穎渡河被執為范陽王虓長史

劉興所殺

復長沙王乂書

文景受圖武皇乘運庶幾堯舜共康政道恩隆洪業本枝百世豈期骨肉豫禍后族專權楊賈縱毒齊趙內篡幸以誅夷而未靜息每憂王室心悴肝爛羊玄之皇甫商等恃寵作禍能不興慨於是征西羽檄四海雲應本

謂仁兄同其所懷便當內擒同等收級遠送如何迷惑
自為戎首上矯君詔下離愛弟推移輦轂妄動兵威還
任豺狼棄戮親善行惡求福如何自勉前遣陸機董督
節鉞雖黃橋之退而溫南收勝一彼一此未足增慶也
今武士百萬良將銳猛要當與整頓海內若能從太尉
之命斬商等首投戈退讓自求多福穎亦自歸鄴都與
兄同之奉覽來告緬然慷慨慎哉大兄深思進退也

晉書

右將軍皇
甫商掌禁兵

河間王顥

字文載安平王孚孫太原王瓌之子歷司徒為南陽王撰所殺

奏討齊王冏表

冏誅趙王倫為大司馬輔政表至冏為長沙王乂所殺

王室多故禍難罔已大司馬冏雖唱義有興復皇位之功而定都邑克寧社稷實成都王之勲力也而冏不能固守臣節實協異望在許昌營有東西掖門官置治書侍御史長史司馬直立左右如侍臣之儀京城大清篡逆誅夷而率百萬之衆來繞洛城阻兵經年不一朝覲百官拜伏晏然南面壞樂官市署用自增廣輒取武庫

祕杖嚴列不解故東萊王挺知其逆節表陳事狀而見
誣陷加罪黜徙以樹私黨僭立官屬幸妻嬖妾名號比
之中宮沈湎酒色不恤羣黎董艾放縱無所畏忌中丞
按奏而取退免張偉惓惓擁停詔可葛旗小監維持國
命操弄王爵貨賂公行羣姦聚黨擅斷殺生密署腹心
實為貨謀斥罪忠良伺閹神器臣受重任蕃衛方獄見
罔所行實懷激憤即日翊軍校尉李含乘驛密至宣騰
詔旨臣伏讀感切五情若灼春秋之義君親無將罔擁

彊兵樹置私黨權官要職莫非腹心雖復重責之誅恐
不義服今輒勒兵精卒十萬與州征並協忠義共會洛
陽驃騎將軍長沙王乂同奮忠誠廢周還第有不順命
軍法從事成都王穎明德茂親功高勲重往歲去就允
合衆望宜為宰輔代罔阿衡之任

晉書

東海王越

字元超高密王泰次子泰宣帝弟歷司徒自領揚州牧討石勒屯項薨勒追焚

其
樞

勅世子毘

王承字安期太原晉陽人東海王越鎮許昌以為記室參軍勅其子毘在

府數
年

夫學之所益者淺體之所安者深閑習禮度不如式瞻

儀形諷味遺言不若親承音旨王叅軍人倫之表汝其

師之

何法盛晉中興書世說注王趙鄧三叅軍人倫之表汝其師之謂王承鄧伯道趙穆也袁宏名士

傳直云

王叅軍

與阮瞻等書

瞻字千里陳留尉氏人越鎮許昌以瞻為記室叅軍與王承謝鯤鄧

攸俱在越府
越與瞻等書

禮年八歲出就外傳明始可以加師訓之則十年曰幼

學明可漸先王之教也然學之所入淺體之所安深是以閑習禮容不如式瞻儀度諷誦遺言不若親承音旨小兒毘既無令淑之質不聞道德之風望諸君時以閑豫周旋誨接

晉書

與趙穆等書

穆字季子汲郡人才識清通歷尚書郎轉太傅叅軍越與穆及承等

書

禮八歲出就外傅十年曰幼學明可以漸先王之教也然學之所受者淺體之所安者深是以閑習禮度不如

式瞻軌儀諷味遺言不如親承辭旨小兒毗既無令淑之資未聞道德之風欲屈諸君時以閑豫周旋燕誨也

趙吳郡
行狀

與江統書

越為兗州牧以統為別駕委以州事與統書統舉高平郝鑒為賢良陳留

阮修為直言濟北程牧
為方正時以為知人

昔王子師為豫州未下車辟荀慈明下車辟孔文舉貴州人士有堪應此者不

致陳敏書

敏字令通廬江人初為合肥度支遷廣陵運漕以濟中州又破張昌石冰

等於高春以功為廣陵相遂有割據江東之志父憂去職越西迎大駕承制起敏為右將軍假節前鋒都督致書時越討豫州刺史劉喬敏引兵會之後自稱大司馬楚公敗誅

將軍建謀富國則有大漕之勲及遭冰昌之亂則首率義徒以寡敵衆外無彊兵之援內無運籌之侶隻身挺立雄畧縱橫擢奇謀於馬首奮靈計於臨危金聲振於江外精光赫於揚楚攻堅陷嶮三十餘戰師徒無虧勅敵自滅五州復全苞茅入貢豈非將軍之功力哉今羯賊屯結游魂河濟鼠伏雉窟藏匿陳留始雖姦盜終圖

不軌將軍孫吳之術既明已試之功先著孤與將軍情
分特隆想割草土之哀抑難居之思捨經執戈來卹國
難天子遠巡鑾輿未反引領東眷有懷山陵當憑將軍
戮力王輅有旋將軍率將所領承書風發米布軍資惟
將軍所運

並晉書

討石勒傳四方檄

越為太傅錄尚書懷帝即位委政於越已領兗州牧鎮許

昌及還洛領司徒專擅威權乃請討石勒東屯于項檄四方州郡携貳憂疾薨

皇綱失御社稷多難孤以弱才備當大任自頃胡寇內

逼偏裨失利帝鄉便為戎州冠帶奄成殊域朝廷上下
以為憂懼皆由諸侯蹉跎遂及此難授袂忘履討之已
晚人情奉本莫不義奮當須合會之衆以俟戰守之備
宗廟主上相賴匡救檄至之日便望風奮發忠臣戰士
效誠之秋也

並晉書

范陽王虓

字武會宣帝弟虓之孫
龍父綏爵歷位司徒

上惠帝表

虓鎮許昌河間王顯表立成都王穎
為太弟為王浚所破挾天子還洛虓

與東平王楸鎮東將軍周馥等上言於是虓
先率衆自許屯於滎陽及惠帝西遷浚表虓

為冀州刺史破劉
喬奉天子還都

自愍懷被害皇儲不建委重前相輒失臣節是以前年
太宰與臣永惟社稷之貳不可久空所以共啓成都王
穎以為國副受重之後而弗克負荷小人勿用而以為
腹心骨肉宜敦而猜佻薦至險詖宜遠而讒說殄行此
皆臣等不聰不明失所宗賴遂令陛下謬於降授雖戮
臣等不足以謝天下今大駕還宮文武空曠制度荒破
靡有孑遺臣等雖劣足匡王室而道路之言謂張方與

臣等不同既惜所在興異又以太宰惇德允元著於具
瞻每當義節輒為社稷宗盟之先張方受其指教為國
效節昔年之舉有死無貳此即太宰之良將陛下之忠
臣但以受性彊毅不達變通遂守前志已致紛紜然退
思惟既是其不易之節且慮事翻之後為天下所罪故
不即西還耳原其本事實無深責臣聞先代明主未嘗
不全護功臣令福流子孫自中間以來陛下功臣初無
全者非獨人才皆劣其於取禍實由朝廷策之失宜不

相容恕以一旦之咎喪其積年之勲既違周禮議功之
典且使天下之人莫敢復為陛下致節者臣等此言豈
獨為一張方實為社稷遠計欲令功臣長守富貴臣愚
以為宜委太宰以關右之任一方事重及自州郡已下
選舉授任一皆仰成若朝之大事廢興損益每輒疇諮
此則二伯述職周召分陝之義陛下復行於今時遣方
還郡令羣后申志時定王室所加方官請悉如舊此則
忠臣義士有勸功臣必全矣司徒戎異姓之賢司空越

公族之望並忠國愛主小心翼翼宜幹機事委以朝政
安北將軍王浚佐命之膺率身履道忠亮清正遠近所
推如今日之大舉實有定社稷之勲此實臣等所以歎
息歸高也浚宜特崇重之以副羣望遂撫幽朔長為北
藩臣等竭力扞城藩屏皇家陛下垂拱而四海自正則
四祖之業必隆於今日月之暉昧而復曜乞垂三思察
臣所言又可以臣表西示太宰

又表

成都王失道為姦邪所誤論王之身不宜深責且先帝遺體陛下羣弟自元康以來罪戮相尋實海內所為匈匈而臣等所以痛心今廢成都更封一邑宜其必許若廢黜尋有禍害既傷陛下矜慈之恩又令遠近恒謂公族無復骨肉之情此實臣等內省悲慙無顏於四海也乞陛下察臣忠款

晉書

東平王楙

字孔偉義陽王望第三子歷光祿大夫洛京陷為亂兵所害

王昌前母服議奏

博士謝衡等及尚書八座議上武帝制報此見晉書又

載杜氏通典人
辭互異列後

相王昌父愍本居長沙有妻息漢末使入中國值吳叛
仕魏為黃門郎與前妻息死生隔絕更娶昌母今江表
一統昌聞前母久喪言疾求平議

守博士謝衡議

雖有二妻盖有故而然不為害於道義宜更相為服

守博士許猛議

地絕又無前母之制正以在前非沒則絕故也前母雖

在猶不應服

散騎常侍劉智安議

禮為常事制不為非常設也亡父母不知其死生者不著於禮平生不相見去其加隆以期為斷

都令史虞溥議

臣以為禮不二嫡所以重正非徒如前議者防妬忌而已故曰一與之齊終身不改未有遭變而二嫡苟不二則昌父更娶之辰是前妻義絕之日也使昌父尚存二

妻俱在必不使二嫡專堂兩婦執祭同為之齊也

博士秦秀議

二妾之子父命令相慈養而便有三年之恩便同所生
昌父何義不命二嫡依此禮乎父之執友有如子之禮
況事兄之母乎

許猛又議

夫少婦稚則不可許以改娶更適矣今妻在許以更聘
夫存而妻得改醮者非絕而何

侍中領博士張惲議

昔舜不告而娶婚禮蓋闕故堯典以釐降二女為文不殊嫡媵傳記以妃夫人稱之明不立正后也夫以聖人之弘帝者嫡子猶權事而變以定典禮黃昌之告新妻使避正室時論許之推姬氏之讓執黃卿之決宜使各自服其母

侍郎山雄魚侍郎著作陳壽議

薄駁一與之齊非大失也禮無二嫡不可以並耳若昌

父及二母於今各存者則前母不廢已有明徵也設令
昌父將前母之子來入中國尚在者當從出母之服苟
昌父無棄前妻之命昌兄有服母之理則昌無疑於不
服

賊曹屬卞粹議

昌父當莫審之時而娶後妻則前妻同之於死而義不
絕若生相及而後妻不去則妾列於前志矣死而會乎
則同祔於葬無並嫡之實必欲使子孫於沒世之後追

計二母隔絕之時以為並嫡則背違死父追出母亡議者以為禮無前母之服者可謂以文害意思以為母之不親而服三年非一無異於前母也

倉曹屬衛恒議

或云嫡不可二前妻宜絕此為奪舊與新違母從子禮律所不許人情所未安也或云絕與死同無嫌二嫡據其相及欲令有服此為論嫡則死議服則生若還自相伐理又不通愚以為地絕死絕誠無異也宜一如前母

不復追服

主簿劉卞議

毖在南為邦族於北為羈旅以此名分言之前妻為元妃後婦為繼室何至王路既通更當逐其今妻廢其嫡子不書姜氏絕不為親以其犯至惡也趙姬雖貴必推叔隗原同雖寵必嫡宣孟若違禮苟讓何則春秋所當善也論者謂地絕其情終已不得往來今地既通何為故當追而絕之邪黃昌見美斯又近世之明比

司空齊王攸議

禮記生不及祖父母諸父昆弟而父稅喪已則否諸儒皆以為父以他故子生異域不及此親存時歸見之父雖追服子不從稅不責非時之恩也但不相見尚不服其先終而況前母非親所生義不踰祖莫往莫來恩絕殊隔而令追服殆非稱情立文之謂也以為昌不宜追服

司徒李膺議

陸為黃門侍郎江南已叛石厚與焉大義滅親況於陸之義可得以為妻乎

虞溥又駁卞粹議

喪從寧戚謂喪事尚哀耳不使服非其親也夫死者終也終事已故無絕道分居兩存則離否由人夫婦以判合為義今土隔人殊則配合理絕彼已更娶代已安得自同於死婦哉伯夷讓孤竹不可以為後王法也且既已為嫡後服復云為妾生則或貶或離死則同祔於葬

妻專一以事夫夫懷二以接已開偽詐之風傷貞信之教於以純化篤俗不亦難乎今昌二母雖土地殊隔據同時並存何得為前母後母乎設使昌母先亡以嫡合葬而前母不絕遠聞喪問當復相為制何服邪夫制不應禮動而愈失夫孝子不納親於不義貞婦不昧進而苟容今同前嫡於死婦使後妻居正而或廢於二子之心曾無慙乎而云誣父棄母恐此文致之言難以定臧否也禮違諸侯適天子不服舊君然則昌父絕前君矣

更納後室廢後妻矣又何取於宜誅宜撫乎且婦人之有惡疾乃慈夫之所愍也而在七出誠以人理應絕故也今夫婦殊域與無妻同方之惡疾理無以異據已更娶有絕前之證而云應服於義何屈

尚書八座議

設令有人於此父為敦煌太守而子後任於洛若父娶妻非徒不見乃可不知及其死亡不得不服但鞠養已者情哀而不相見名制雖戚念之心殊而為之服一也

又兩后匹嫡自謂違禮不謂非常之事而以常禮處之也昔子思哭出母於廟其門人曰庶氏之女死何為哭於孔氏之廟子思懼改哭於他室若昌不制服不得不告其父祖掘其前母之尸徙之他地若其不徙昌為罪人何則異族之女不得祔於先姑藏其墓次故也且夫婦人牽夫猶有所尊趙姬之舉禮得權通故先史詳之不譏其事耳今昌之二母各已終亡尚無並主輕重之事也昌之前母宜依叔隗為比若亡在昌未生之前者

則昌不應復服生及母存自應如禮以名服三年輒正
定為文草下太常報牀奉行

武帝制

凡事有非常當依準舊典為之立斷今議此事稱引趙
姬叔隗者粗是也然後狄與晉和故姬氏得迎叔隗而
下之吳寇隔塞陸與前妻終始永絕必義無兩嫡則趙
衰可以專制隗氏昌為人子豈得擅替其母且陸二妻
並以絕亡其子猶後母之子耳昌故不應制服也

著作郎干寶論

太興初
追論

禮有經有變有權王陵之事有為為之也有不可責以
始終之義不可求以循常之文何羣議之紛錯同產者
無嫡側之別而先生為兄諸侯同爵無等級之差而先
封為長今二妻之入無貴賤之體則宜以先後為秩順
敘義也今生而同室者寡死而同廟者衆及其神位固
有上下也故春秋賢趙姬遭禮之變而得禮情也且夫
吉凶哀樂動乎情者也五禮之制所以敘情而即事也

今二母者本他人也以名來親而恩否於時敬不及生
愛不及喪夫何追服之道哉張惲劉卞得其先後之節
齊王衛恒通於服絕之制可以斷矣朝廷於此宜導之
以趙姬齊之以詔命使先妻恢含容之德後妻崇卑讓
之道室人達長少之敘百姓見變禮之中若此可以居
生又況於死乎古之王者有以師友之禮待其臣而臣
不敢自尊今令先妻以一體接後而後妻不敢抗及其
子孫交相為服禮之善物也然則王昌兄弟相得之日

蓋宜祫祭二母等其禮饋敘其先後配以左右兄弟肅
雍交酬奏獻上以恕先父之志中以高二母之德下以
齊兄弟之好使義風弘於王教慈讓洽乎急難不亦得
禮之本乎

同前

杜氏
通典

博士謝衡議

愆身不幸去父母遠妻子妻於其家執義守節奉宗祀
養舅姑育稚子後得歸還則固為已妻父既為妻子宜

不為母昌宜追服三年

博士許猛議

絕有三道且夫絕妻如紀叔姬其逼以王法隔以殊域而更聘嫡室者亦為絕矣是以禮有繼母服無前母制是以前母非沒則絕也以昌前母雖在猶不應服若昌父在則唯命矣依禮記昌唯宜追服其兄耳

尚書都令史虞溥議

臣以為禮不二嫡重正也苟正嫡不可以二則昌父更

娶之辰即前婦義絕之日固不待言而可知矣議者以昌父無絕遣之言尚為正嫡恐犯禮虧教難以示後按昌父既冊名魏朝更納後室豈得懷舊君於江表存外妻於讐國乎非徒時政之所禁乃臣道所宜絕設使昌父尚存今始會同必不使兩妻專尚二嫡執祭以此驗之故知後嫡立宜前嫡廢也即父使有兩立之言猶將以禮正之況無遺命可以服乎溥以為宜如猛議

博士秦秀議

按議者以禮無前妻之名依名絕之不為之服斯乃是也今兄弟不同居而各以路人相遇其母恐一體之愛從此絕矣古人之為未必按文唯稱情耳以為二母之子宜各相事皆如所生雖無成典期於和睦得禮意也若前妻之子不勝母之哀來言曰我母自盡禮於事天為夫先祖所歆享為父志所嘉為人倫所欽敬便迎父喪歸於舊塋以其母祔葬則後妻之子寧可以據儒者之言以距之耶禮二妾之子父命令相慈而三年之恩

便同所生矣昌父何義不令二嫡依此禮乎然禮無明制非末學者所敢用心必不得已與其意而絕之不若意而事之故以為昌宜追前母三年二母之祔以先後為敘

侍中程咸議

諸侯無更娶致夫人之制大夫妻死改室不拘立嫡昌父前妻守德約身幸值聞通而固絕之此禮不勝情而漸入於薄也昌母後娉本非庶賤橫加抑黜復不然矣

若令二母之子交相為服則並尊兩嫡禮之大禁昔舜不告而娶婚禮蓋闕傳記以二妃夫人稱之明不足立正后也聖人之弘猶權事而變而諸儒欲聽立兩嫡並未前聞且趙姬讓叔隗以為內子黃昌之告新妻使避正堂皆欲以正家統而分嫡妾也昌父已亡無正之者若追服前母則自黜其親交相為服則固非嫡就使未達追為之服猶宜刑貶以匡失謬況可報稱施行正為通例則兩嫡之禮始於今矣開爭長亂不可以訓臣以

為昌等當各服其母者

著作郎陳壽等議

春秋之義不以得寵而忘舊是以趙姬請迎叔隗而已
下之若昌父及二母於今並存則前母不廢有明徵矣
設使昌父昔持前母所生之子來入中國而尚在者恐
不謂母已黜遣從出母之服苟昌父無棄前妻之命昌
兄有服母之理則昌無疑於不服

司馬李苞議

禮重統所以正家猶國不可二君雖禮文殘闕大事可知昌父遇難與妻隔絕夫得更娶妻當更嫁此通理也今之不去此自執節之婦不為理不絕矣適可嘉異其意不得以私善羈縻已絕之夫議者以趙姬為比愚以為不同也重耳適齊志在必還五年之間未為離絕衰納新寵於禮為廢嫡於義為棄舊姬氏固讓得禮之正是以春秋善之明不得竝也古無二嫡宜如溥駁

中書監荀勗議

昔鄭子羣娶陳司空從妹後隔呂布之亂不知存亡更娶蔡氏女徐州平後陳氏得還遂二妃竝存蔡氏之子元疊為陳氏服嫡母之服族兄宗伯曾責元疊謂抑其親鄉里先達以元疊為合宜

新野王歆

字弘舒扶風王駿子宣帝孫

上言張昌賊狀


昌本義陽蠻太安中聚眾安陸奉劉尼為主稱漢其眾皆以絳

科頭指之以毛歆為鎮南大將軍討昌兵敗見殺陶侃等平之

妖賊張昌劉尼妄稱神聖犬羊萬計絳頭毛面挑刀走

戰其鋒不可當請臺勅諸軍三道救助

晉書



西晉文紀卷四